



VENDIM
Nr. 348, datë 29.4.2020

**PËR PROCEDURAT, KRITERET DHE
RREGULLAT PËR ZBATIMIN E
PROGRAMIT TË NXITJES NËPËRMJET
VETËPUNËSIMIT**

Në mbështetje të nenit 100 të Kushtetutës dhe të pikës 4, të nenit 11, të ligjit nr.15/2019, “Për nxitjen e punësimit”, me propozimin e ministrit të Financave dhe Ekonomisë, Këshilli i Ministrave

VENDOSI:

I. DISPOZITA TË PËRGJITHSHME

1. Ky vendim përcakton kriteret, procedurat dhe rregullat për zbatimin e programit të vetëpunësimit, i cili ka si qëllim nxitjen e vetëpunësimit nëpërmjet krijimit të sipërmarrjeve të reja të punëkërkesve të papunë të interesuar.

2. Programi i vetëpunësimit është program njëvjeçar për mbështetjen e sipërmarrjeve të reja, nëpërmjet të cilit ofrohet trajnim për sipërmarrjen dhe zhvillimin e planeve të biznesit për aplikuesit dhe grant për përfituesit.

3. Fondi i nxitjes së punësimit për programin sipas pikës 1, të këtij kreu, mbulon shpenzimet për:

- a) grantin për hapjen e biznesit të ri;
- b) vlerësimin e planeve të biznesit.

4. Ky program zbatohet bazuar në një proces të drejtë dhe konkurrues aplikimi.

5. Ky program zbatohet dhe administrohet nga Agjencia Kombëtare e Punësimit dhe Aftësisë (AKPA).

6. AKPA-ja, sipas nevojës, mund të kontraktojë subjekte të tjera publike, private apo organizata të shoqërisë civile, veprimtaria e të cilave është e lidhur me fushën e punësimit, për të bërë të mundur zbatimin me cilësi dhe në kohë të programeve të nxitjes së punësimit, sipas legjislacionit në fuqi.

II. KRITERET E APLIKIMIT, PËRFITUESIT DHE MBËSHTETJA

1. Për të aplikuar në këtë program, aplikuesi duhet të plotësojë kriteret e mëposhtme:

- a) Është punëkërkes i papunë i regjistruar në strukturën vendore të punësimit;
- b) Ka një ide biznesi, e cila nuk është në kundërshtim me kriteret e konkurrueshmërisë, të

përcaktuara në dispozitat e Kodit të Punës dhe që deklarohet në bazë të një formulari të posaçëm, i cili përmban:

- i. përshkrimin e idesë së biznesit;
- ii. relevancën (rëndësinë);
- iii. burimet e nevojshme për realizimin e biznesit;

iv. vlerësimin e gjendjes së mjediseve ku do të zhvillohet biznesi.

2. Punëkërkesi, i cili aplikon në këtë program, duhet të marrë pjesë personalisht në të gjitha hallkat e procesit.

3. Një punëkërkes mund të përfitojë vetëm një herë nga ky program.

4. Shpenzimet për vlerësimin e planit të biznesit të të gjithë pjesëmarrësve, në vlerën jo më shumë se 3 000 (tre mijë) lekë për çdo plan biznesi, sipas çmimeve të tregut për këtë lloj ekspertize, mbulohen nga AKPA-ja, nga zëri i buxhetit “Programet e nxitjes së punësimit”.

5. Programi subvencionon për të gjithë të përzgjedhurit si përfitues grantin për ngritjen e biznesit deri në masën 500 000 (pesëqind mijë) lekë.

6. Shpenzimet që nuk mund të mbulohen nga granti i financuar janë:

- a) blerja e pasurive të patundshme;
- b) çdo shpenzim që nuk lidhet dhe nuk përfshihet në planin e biznesit të miratuar;
- c) shpenzimet e kryera përpara nënshkrimit të marrëveshjes së grantit;
- ç) pagat, shpërblimet, qiraja dhe shpenzimet e tjera administrative.

III. RREGULLAT DHE PROCEDURAT PËR PËRFITIMIN E PROGRAMIT TË VETËPUNËSIMIT

1. AKPA-ja, nëpërmjet strukturave të saj, publikon informacionin e nevojshëm në Buletinin e Njoftimeve Publike dhe në platforma të tjera në lidhje me zbatimin e programit dhe zhvillon një fushatë informuese për aplikim për të gjithë personat e interesuar, për mundësinë e pjesëmarrjes si dhe për kriteret e procedurat e aplikimit.

2. Afati për të aplikuar në program, për të gjithë punëkërkesit e papunë, është 30 (tridhjetë) ditë kalendarike nga data e shpalljes së thirrjes.

3. Punëkërkesi duhet të paraqesë pranë strukturës përkatëse të punësimit ose të ngarkojë në mënyrë elektronike dokumentet e mëposhtme:



a) Formularin e aplikimit, i cili duhet të përmbajë:

- i. projektidenë e detajuar të biznesit;
- ii. vetëdeklarimin mbi plotësimin e kushteve të programit dhe marrjen e përgjegjësisë në rastet e deklarimeve të rreme;
- iii. deklaratë për të autorizuar strukturën përkatëse të punësimit të kërkojë apo të gjenerojë on-line dokumentacionin e nevojshëm për verifikimet e përputhshmërisë.

b) Vërtetimin që personi nuk ka detyrime tatimore;

c) Kopjen e dokumentit identifikues.

4. Struktura vendore e punësimit verifikon plotësimin e kushteve formale paraprake të aplikimit dhe përputhshmërinë e tij me rregullat e zbatimit të këtij programi dhe, brenda 5 (pesë) ditëve pune, dërgon në strukturën rajonale të punësimit listat e aplikantëve, që i kanë përmbushur këto kushte.

5. Struktura rajonale e punësimit, në bashkëpunim me ofruesit e arsimit dhe formimit profesional, harton, brenda 5 (pesë) ditëve pune, planin e zhvillimit të trajnimit për sipërmarrjen dhe zhvillimin e planeve të biznesit.

6. Brenda 10 (dhjetë) ditëve pune duhet të fillojë trajnimi në ofruesit e AFP-së.

7. Kohëzgjatja e trajnimit është 3 (tre) javë kalendarike dhe në përfundim të trajnimit zhvillohet testim me shkrim.

8. Pjesëmarrësit, të cilët kalojnë me sukses testimin me shkrim, dorëzojnë në Drejtorinë e Përgjithshme të APKA-së, brenda 7 (shtatë) ditëve pune, planin e biznesit. Plani i biznesit përmban një seksion specifik me të gjitha shpenzimet e domosdoshme për themelimin e biznesit. Secili prej zërave të shpenzimeve duhet të specifikojë burimin përkatës të financimit nga ky program ose burime të tjera, për të cilat duhet të bashkëlidhë dokumentacionin vërtetues.

9. Vlerësimi i planeve të biznesit realizohet, brenda 15 (pesëmbëdhjetë) ditëve pune, nga AKPA-ja, në dy faza:

- a) Vlerësimi i planit të biznesit nga ekspertë të jashtëm të fushës mbi bazën e këtyre kriterëve:
 - i. Realizueshmëria financiare e projektit;
 - ii. Burimet në dispozicion për themelimin e biznesit;
 - iii. Njohja e llojit përkatës të biznesit;

iv. Vlerësimi i tregut.

b) Procesi i vlerësimit nga komisioni i ngritur në Drejtorinë e Përgjithshme të AKPA-së përfshin hapat e mëposhtëm:

i. Zbatimin e procedurës në bazë të rregullores përkatëse;

ii. Bën renditjen e aplikuesve në varësi të pikëve;

iii. Shqyrton mundësitë e financimit dhe bën renditjen sipas pikëve dhe mundësive të financimit.

10. Komisioni për vlerësimin e planit të biznesit ngrihet me fillimin e procesit të këtij programi dhe përbëhet nga tre anëtarë, si më poshtë vijon:

a) Një përfaqësues nga AKPA-ja;

b) Një përfaqësues nga Drejtoria Rajonale;

c) Një përfaqësues nga ministria përgjegjëse për punësim.

11. Përzgjedhja e anëtarëve të këtij komisioni bëhet, si më poshtë vijon:

a) Përfaqësuesi i ministrisë caktohet nga ministri përkatës;

b) Përfaqësuesi i AKPA-së dhe i Drejtorisë Rajonale do të caktohen nga drejtori i Përgjithshëm i institucionit.

12. Mënyra e organizimit, e vlerësimit të projekteve, e funksionimit të punës, e informimit si dhe përbërja e komisionit përcaktohen në rregulloren e zbatimit të programeve të nxitjes së punësimit.

13. Drejtoria e Përgjithshme e AKPA-së shpall listën e fituesve nëpërmjet strukturave vendore të punësimit dhe njofton njëkohësisht strukturat rajonale të punësimit për ndjekjen e procedurave në vijim.

14. Aplikuesit e përzgjedhur duhet të regjistrojnë, brenda 5 (pesë) ditëve pune, sipërmarrjet e reja në Qendrën Kombëtare të Biznesit, të hapin një llogari bankare për biznesin dhe të depozitojnë te struktura rajonale e punësimit dokumentet provuese.

15. Pas dorëzimit të këtyre dokumenteve, struktura rajonale e punësimit dhe çdo përfitues nënshkruajnë kontratën për përfitimin e grantit.

16. Financimi bëhet në këto faza:

a) Me nënshkrimin e kontratës, përfituesit i transferohen si paradhënie në llogarinë e biznesit 20% e vlerës së grantit, shumë të cilën përfituesi duhet ta justifikojë me fatura të rregullta tatimore dhe vërtetim të kryerjes së pagesave, si kusht për financimin e pjesës së mbetur të grantit;



b) Vlera e mbetur e grantit i rimburohet deri në dy këste, të justifikuara me fatura të rregullta tatimore dhe vërtetimin e kryerjes së këtyre pagesave.

c) Vlera e plotë e grantit duhet të shpenzohet brenda katër muajve nga lidhja e kontratës me strukturën rajonale të punësimit;

ç) Përfituesit nuk duhet të shkelin asnjë nga kushtet e kontratës për përfitimin e grantit dhe zbatimin e programit. Nëse përfituesit shkelin kushtet e kontratës, përfituesi është i detyruar të kthejë 100% të mbështetjes financiare të përfituar deri në atë moment.

17. Monitorimi i zbatimit të programit kryhet nga strukturat përkatëse të punësimit.

IV. DISPOZITA TË FUNDIT

1. Ministria përgjegjëse për çështjet e punësimit përcakton çdo vit prioritetet për programet e nxitjes së punësimit sipas zonave gjeografike, sektorëve ekonomikë dhe nevojave të punëkërkuarve dhe miraton planin e zbatimit të fondeve të nxitjes së punësimit, pas propozimit nga Drejtoria e Përgjithshme e Agjencisë Kombëtare të Punësimit dhe Aftësive. AKPA-ja njofton periodikisht ministrinë përgjegjëse për çështjet e punësimit për ecurinë e programit.

2. AKPA-ja përgatit raportin vjetor brenda datës 31 mars të vitit pasardhës dhe ia paraqet ministrisë përgjegjëse për çështjet e punësimit dhe strukturës përgjegjëse të ndihmës shtetërore.

3. AKPA-ja ruan të dhënat për programet për 10 (dhjetë) vjet, në përputhje me legjislacionin përkatës në fuqi.

4. Vlerësimi i ndikimit të programeve kryhet çdo 4 (katër) vjet nga ministria përgjegjëse për çështjet e punësimit, nëpërmjet ekspertëve ose organizatave me përvojë në këtë fushë.

5. Afati i zbatimit të programeve të përcaktuara në pikën 1, të kreut I, është 5 (pesë) vjet nga hyrja në fuqi.

6. Ngarkohet drejtori i Përgjithshëm i AKPA-së për miratimin e rregullores së zbatimit të programeve të nxitjes së punësimit, sipas pikës 1, të këtij kreu, brenda 3 (tre) muajve nga hyrja në fuqi e këtij vendimi.

7. Efektet financiare, që rrjedhin nga zbatimi i këtij vendimi, të përballohen nga buxheti i shtetit “Zëri i nxitjes së punësimit” dhe nga fondi social i punësimit, pas krijimit të tij.

8. Ngarkohen Ministria e Financave dhe Ekonomisë dhe Agjencia Kombëtare e Punësimit dhe Aftësive për zbatimin e këtij vendimi.

Ky vendim hyn në fuqi pas botimit në Fletoren Zyrtare.

KRYEMINISTËR
Edi Rama